

გორში ევროკომისიის წარმომადგენლები იმყოფებოდნენ

04 თებერვალი 2023

გორს ევროკომისიის სამეზობლოს და გაფართოების საკითხებზე მოლაპარაკებების გენერალური დირექტორატის (DG NEAR) C1 საქართველოს, მოლდოვის და ეკონომიკური ინვესტიციების გეგმის დეპარტამენტის ხელმძღვანელი დიანა იაბლონსკა, ევროკომისიისა და საქართველოში ევროკავშირის წარმომადგენლები სტუმრობდნენ. დელეგაციას შიდა ქართლის სახელმწიფო რწმუნებულმა მიხეილ შაყულაშვილმა გორის მუნიციპალიტეტის მერთან ვლადიმერ ხინჩეგაშვილთან და გორის მუნიციპალიტეტის საკრებულოს თავმჯდომარესთან დავით რაზმაძესთან ერთად უმასპინძლა. სტუმრებმა გორში ევროკავშირის მიერ მხარდაჭერილი პროექტი დაათვალიერეს, რომელის ფარგლებშიც ლომჭაბუკის მონუმენტის, სკვერისა და ამავე სკვერში არსებული შენობის (საგამოფენო სივრცე) რეაბილიტაცია განხორციელდა. ასევე, მოენყო გორისციხის გარშემო საფეხმავლო ბილიკი, რეაბილიტირდა რუსთაველის მემორიალი და მიმდებარე სკვერი. გარდა ამისა, გორის ეთნოგრაფიული მუზეუმის ტერიტორიაზე სახელოსნოები (ტრადიციული რენვისა და კულინარიის სივრცეები), ხოლო ლომჭაბუკის სკვერის მიმდებარედ ტურიზმის საინფორმაციო ცენტრი აშენდა. რეაბილიტაცია ჩაუტარდა გორის ძველ, ისტორიულ ხიდს. პროექტის საერთო ბიუჯეტი 958 836 ევროა, საიდანაც ევროკავშირისგან გრანტის სახით 600 000 ევრო გამოიყო, ხოლო გორის მუნიციპალიტეტის თანადაფინანსების წილი 358 836 ევროს შეადგენს.

ევროკომისიის წარმომადგენლებმა ლომჭაბუკის სკვერში მდებარე საგამოფენო სივრცე - ხელოვნების სახლიც მოინახულეს, ასევე ეწვივნენ გორის ეთნოგრაფიულ მუზეუმსა და გორის ციხეს. „ჩვენს სტუმრებთან ერთად დღეს სწორედ ის პროექტები მოვინახულეთ, რომლებიც მათთან პარტნიორობით განხორციელდა. გორის ციხის მიმდებარედ არსებული ლომჭაბუკის სკვერი თავისი ინფრასტრუქტურით მნიშვნელოვანი ტურისტული ადგილია ქალაქისთვის და მის განახლებასაც განსაკუთრებული დატვირთვა ჰქონდა ჩვენთვის. მინდა, მადლობა გადავუხადო ევროკავშირის წარმომადგენლობას თანამშრომლობისთვის და მხარდაჭერისთვის, ვიმედოვნებ, სამომავლოდ კიდევ უფრო მჭიდროდ ვითანამშრომლებთ და ჩვენი პარტნიორობა კიდევ უფრო გაღრმავდება. ჩვენთვის დიდი მნიშვნელობა აქვს გამოცდილების გაზიარებას, მით უფრო, ჩვენი ქვეყნის ევროინტეგრაციის გზაზე.“ - აღნიშნა მხარის რწმუნებულმა.